
COMUNICÂT STAMPE

**RAI: LENGHIS IN MUSICHE, IL DOCUMENTARI
SUL LIET INTERNATIONAL**

IN ONDE LA PRIME PONTADE DOMENIE AI 12 DI AVOST SUL TIERÇ CANÂL

Udin, ai 9 di Avost 2012 - Ogni an desenis di grops musicâls a rivin di lontanis regions de "Grande Europe", ven a stâi la Europe storiche (Comunitât europeane, Russie, Balcans) e si metin in competizion par vinci intun festival indulà che a puedin partecipâ dome cjançons interpretadis tes lenghis minoritariis che a componin la ricjece culturâl dal Vieli Continent.

Cheste manifestazion si clame "Liet International" e l'an passât si è tignude in Novembar propit a Udin cu la organizazion de ARLeF Agenzie regionâl pe lenghe furlane e in colaborazion cu lis coperativis Onde Furlane e Il Campo, intun teatri "Giovanni da Udine" plen di int, soledut di zovins.

Lis imagjinis dal concerti, lis intervistis ai protagoniscj, lis testimoneancis dai vincidôrs, il *backstage* e lis curiositâts su la musiche e lis lenghis europeanis mancun pandudis si podaran viodi tal video documentari "Lingue in musica - Festival delle lingue minoritarie" che al larà in onde in dôs pontadis di 25 minûts su la Rai.

La prime pontade e sarà trasmetude cheste domenie, ai 12 di Avost, aes 10.15 su la tierce rêta a difusion regionâl; la seconde ai 19 di Avost, simpri aes 10.15 di buinore.

Il documentari, realizât di Marco D'Agostini, al sarà un viaç musicâl e gjeografic unic e inmagant, par aprofondî il sverzelât panorame dal Liet, indulà che il Friûl si è mostrât pont di riferiment organizatîf e propueste musicâl di cualitât.

Un rûl, chel dal Friûl, che si confermarà ancje in curt cun l'event SUNS 2012, il festival che al fâs part dal circuit dal Liet e che si tignarà propit te sierade a Udin.

INFO: 0432 555724